

**SECONDA SESSIONE URDINARIA DI U 2022**  
**RIUNIONE DI I 30 DI GHJUGNU E PRIMU DI**  
**LUGLIU DI 2022**

**2EME SESSION EXTRAORDINAIRE DE 2022**  
**REUNION DES 30 JUIN ET PREMIER JUILLET**  
**2022**

2022 / E3/041

**REPONSE DE MONSIEUR DOMINIQUE LIVRELLI A LA QUESTION DEPOSEE PAR  
MADAME MARIE-CLAUDE BRANCA AU NOM DU GROUPE CORE IN FRONTE**

**Objet** : Riorganizzazioni et sviluppu di a CDAF (Commission départementale d'aménagement du foncier)

Signora Consigliera,

Com'è l'aveti mintuvata, cù a criazioni di a Cullittività unica sò scumparsi i cummissioni dipartimentali d'accunciamentu fundiaru (CDAF), chì i so pruciduri erani sottu à a rispunsabilità di i dipartimenti.

Pà a missa in anda, oramai sottu à l'egida di a Cdc, di a « Cummissioni d'Accunciamentu fundiaru di Corsica », sò stati fatti i dumandi di designazioni pà i membri da numinà fora di l'Assemblea di Corsica è chì devini participà à quilla istanza, chì hè cumposta sionti l'articulu L 128-3 di u Codici rurali :

- Un cummissariu d'inchiesta designatu in accordu da i presidenti di i tribunali ghjudiziarrii d'Aiacciu è di Bastia
- 8 consiglieri à l'Assemblea di Corsica
- 6 parsoni qualificati designati da u Prisedenti di u Cunsigliu esecutivu
- 4 merri designati, dui da l'associu di i merri di Pumonti è dui da l'associu di i merri di Cismonte ;
- U Prisedenti di a Camara righjunali d'agricultura di Corsica è i Prisedenti di i Camari dipartimentali d'agricultura o u so raprisintanti ;

- I Presidenti di l'organizzazioni sindacali di i ghjovani agricoltori è di ogni organizzazioni sindacali di l'agricoltori ;
- U Presidenti di u Cunsigliu righjunali di i nutari ;
- Dui pruprietarii affittadori, dui pruprietarii sfruttadori, dui sfruttadori lucatarii, designati da u Presidenti di u Cunsigliu esecutivu di Corsica ;
- Dui raprisintanti di l'associ agraditi in materia di prutizzioni di l'ambienti ;
- U Presidenti di l'Uffiziu di sviluppu agriculu di Corsica.

Di fatti v'accertu ch'è a stallazioni di sta cummissioni hè privista in corsu di st'annata, subbitu da chi l'insempu di sti membri, in particulari quilli da fora di a nostra Assemblea, sarani stati numinati.

Soprattuttu, al di là di a vostra dumanda, vulariu incalcà certi punti :

- Prima, riaccirtà a nostra primura par 'ssa dimarchja ch'è pìrmittarà à a CdC d'intarvena in u duminiu di l'accunciamentu fundiaru rurali, cù u fini di migliurà i cundizioni di sfruttamentu di i pruprietarii agriculi o furistieri, di assicurà a missa in valori di i spazii naturali campagnoli, è di cuntribuì à l'assestu di u tarritoriu cumunali è intercumunali comu difinitu in i piani lucali d'urbanisimu è i carti cumunali :
- Vali à d'è, tuttu què participendu à a mubilizzazioni di u fundiaru agriculu cun scopi di produzzioni, in leia cun l'uriintazioni di a nostra Cullittività in materia di prutizzioni è di missa in valori di quilli spazii, com'è privista da u PADDUC.
- Dopu, insista nantu à u fattu ch'è ci tuccherà à metta in opara l'insempu di i prirugativi attaccati à sta cummissioni, frà altru :
  - o Pruciduri di rimembramentu di i tarri (ch'è si chjama oramai accunciamentu fundiaru agriculu è furistieru : AFAF) ;
  - o Scambii è cissioni à l'amichevuli d'immobiliari rurali ;
  - o È dinò pruciduri di ricuperu di tarri inculti, à titulu individuali ma soprattuttu in un quattru cullittivu, in leia cù i cullittività lucali, cun basa di l'invintariu di i tarri à guaru, ch'è a so missa in opara dipendi di a CTPENAF (art L. 125-5 di u codici rurali), com'ella s'hè fatta à l'isula di a Riunioni, par un dittu.
- Infini, rammintà ch'è in u cuntestu di disestu fundiaru storicu in certi tarritorii rurali, a quistioni di a riorganizzazioni di u fundiaru cumanda una pulitica strutturali più larga, ch'è no t'avaremu da discuta cù u Statu : ch'è mezi, ch'è calindariu, ch'è fiscalità, ch'è trasfirimentu di cumpitenzi par livà infini stu prublema ch'è custituisci un frenu à l'attività icunomica, à a prisirvazioni di i nostri rughjoni è à u sviluppu di a nostra agricoltura.

Eccu l'elementi ch'è vultu accustà pà risponda à a vostra dumanda.

Vi ringraziau.